

Kwa Ulimwengu Mzima,

Akawaambia, Enendeni ulimwenguni mwote, mkaibubiri injili kwa kila kiumbe.

Marko 16:15.

Nuru ambayo Mungu amewapatia watu Wake haipaswi kufungiwa ndani ya makanisa ambayo yamekwisha kufahamu kweli. Inatakiwa kuangazwa kila mahali palipo na giza ulimwenguni. Wale wanaotembea nuruni kama Kristo alivyo nuruni watashirikiana na Mwokozi kufunua kwa wengine kile ambacho Kristo amewafunulia wao. Ni kusudi la Mungu kwamba ukweli wa wakati huu kweli ufahamike kwa kila jamaa, taifa, lugha na watu. Katika ulimwengu wa sasa wanaume na wanawake wamezama katika kutafuta mali na anasa za ulimwengu. Wapo maelfu elfu ambao hawatengi muda au kufikiri kuhusu wokovu wa nafsi. Muda umefika ambapo ujumbe wa kuja kwa Kristo upesi unatakiwa kutangazwa ulimwenguni kote.

Ushahidi uliodhahiri unatuelekeza katika ukaribu wa ule mwisho. Maonyo yanapaswa kutolewa kwa sauti yakinifu. Njia sharti iandaliwe kwa ajili ya ujio wa Mtawala wa Amani ajaye katika mawingu ya mbinguni. Yapo mengi ya kufanya katika miji ambayo haijasikia ukweli wa wakati huu. Hatupaswi kuanzisha taasisi ili kushindana kwa ukubwa na ufahari na taasisi za kidunia; bali kwa jina la Bwana, tukiwa wa ustahimilivu usiochoka na bidi isiyochoka ambayo Kristo amewapatia watenda kazi Wake, tuendeleze kazi ya Bwana.

Kama jamii ya wanadamu tunapaswa kuinyenyekesha sana mioyo yetu kwa Mungu, tukiomba msamaha kwa kupuuza kwetu kutimiza agizo la utume. Tumefungua vituo vikubwa katika maeneo machache, tukiacha miji muhimu bila kufanyiwa kazi. Hebu sasa na tufanye kazi tuliyoitwa na kutangaza ujumbe utakao waamsha wanaume na wanawake kutambua hatari iliyopo mbele yao...

Kila kitu kilichopo ulimwenguni kinawaashiria wale wanaofahamu ujumbe wa kujiweka wakfu wao wenyewe kikamilifu katika kutangaza kweli kama ilivyofunuliwa kwao katika ujumbe wa malaika wa tatu. Kile tunachokiona na kusikia kinatuashiria kufanya wajibu wetu. Utendaji kazi wa mawakala wa Shetani unatoa wito kwa kila Mkristo kusimama katika zamu yake...

Wanahitajika wanaume na wanawake wanaoguswa na mateso ya wanadamu ambao maisha yao hushuhudia kwamba wanapokea na kuangaza nuru, uhai na neema.

Watu wa Mungu wanapaswa kusogea karibu na Kristo wakijikana nafsi na kujitoa, lengo lao likiwa ni moja tu, kutangaza ujumbe wa rehema kwa ulimwengu mzima. Wengine watafanya kazi kwa namna moja na wengine kwa namna nyingine, kama ambavyo Bwana atawaita na kuwaongoza kutenda. Lakini wanapaswa kufanya bidii kwa pamoja, wakilenga kuifanya kazi kwa ukamilifu wote. Kwa kutumia kalamu na sauti zao waifanye kazi Yake. Neno lililochapwa linapaswa kufasiriwa katika lugha mbalimbali na kuenezwa hata mwisho wa dunia... Kila muumini, msomi au asiye msomi aweza kupeleka ujumbe (**Testimonies for the Church 9:24-26**).